

PLEIV SUMVITG

Carnet da pensums
per la grupp da liturgia
dalla pleiv Sumvitg

Quest carnet da pensums duei reglar las activitads dalla grupp da liturgia dalla pleiv Sumvitg.

Las indicaziuns davart las personas e las funcziuns en quest carnet da pensums sereferesch ad omisduas schlatteinas, aschilunsch ch'ei resulta buc enzatgei auter ord il senn dalla constituziun.

Intent e finamiras

Enteifer la grupp da liturgia s'engaschan parochianas e parochians dalla pleiv Sumvitg per ina stretga collaboraziun enteifer la pleiv e quei cun risguardar commensuradamein las particularitads dallas anteriuras pleivs.

La grupp da liturgia collaborescha cul plevon e cussegliera era quel ensemen cul cussegl pastoral en tuttas damondas da pastoraziun ed organisaziun pastorala.

Il commembers dalla grupp da liturgia s'engaschan – mintgin e mintgina tenor sias habilitads – cun pensums particulars enteifer il survetsch divin sco era ella lavur pastorala.

Cumposiziun

La grupp da liturgia consista ord:

- a) **la grupp da liturgia dalla pleiv Sumvitg,**
- b) **las gruppas da liturgia localas per Rabiun, Sumvitg/Cumpadials e Surrein.**

La grupp da liturgia dalla pleiv Sumvitg vegn tgamunada d'in menader. Plinavon duei mintgamai ina persona esser responsabla per la lavur da mintga singula grupp da liturgia locala. Quellas treis personas che vegnan nominadas ord la grupp da liturgia ein ensemen cul plevon la giunta dalla grupp da liturgia dalla pleiv Sumvitg.

Plinavon s'engaschan ulteriurs gidonters en mintga vitg tenor basegns e pusseivladad per las differentas incaricas e pensums che la grupp da liturgia dalla pleiv Sumvitg ni la grupp da liturgia locala prestan. Tut quellas personas formeschan ensemen culla giunta la grupp da liturgia dalla pleiv Sumvitg. Igl engaschament dils commembers dalla grupp da liturgia duei vegnir promovius era sur ils cunfins digl agen vitg ora.

Il commembers dalla grupp da liturgia dalla pleiv Sumvitg vegnan recrutai ed engaschai dalla grupp sezza. La suprastanza da pleiv ed il cussegl pastoral segidan leutier tenor basegns. Il temps d'engaschament ei buca definitus.

Ina cumbinaziun d'uffeci denter cussegl pastoral e la grupp da liturgia ei pusseivla.

Organisaziun

La giunta dalla grupp da liturgia s'entaupa tenor basegns per organisar las incaricas che sedattan ella pleiv. L'invitaziun cullas tractandas succeda entras il menader dalla grupp. En quellas sedutas vegn era definiu tgi ch'ei responsabels pils differents pensums enteifer las gruppas da liturgia localas.

La grupp da liturgia vegn era sustenida dil secretariat dalla pleiv che collaborescha e sustegn tier damondas d'administraziun.

Ils secturs

Per dar damogn als differents pensums ch'ina pleiv sto ademplir differenziescha la grupp da liturgia ils suandonts secturs da lavur. Ils commembers san far part da plirs secturs, mintgamai tenor lur habilitads e sco els vulan s'engaschar.

Il sectur „LITURGIA“

Sut l'expressiun „liturgia“ capesch'ins rituals per ludar Diu e per profundar la cardientscha. La liturgia cumpeggia tuttas fuormas da survetsch divin ed oraziun.

En quei sectur ein ils pensums defini sco suonda:

- a) sustener il plevon en damondas e giavischs che pertuccan la liturgia,
- b) organisaziun ed accumpignament dil survetsch da lecturas e gidontras che partan ora la communiun,
- c) responsablada per l'organisaziun e preparaziun da survetschs divins dil plaid e devoziuns,
- d) organisaziun da rusaris ordinaris,
- e) organisaziun e coordinaziun dil plan da messas ella pleiv,
- f) promoziun da fuormas da liturgia che risguardan ils segns dil temps ed ils basegns da parochianas e parochians.

Il sectur „DIACONIA“

Il plaid „diaconia“ deriva dil lungatg grec e munta „survir“. Sut diaconia capesch'ins tut ils aspects dils survetschs al concarstgaun che succedan enteifer la Basalgia. Las vertids cristianas dalla diaconia semuossen en solidaritad, cumpassiun, agid spontan e.a.v..

En quei sectur ein ils pensums defini sco suonda:

- a) intermediaziun tiel plevon per visetas dils malsauns a casa, en spital ni en casas da vegls,
- b) responsabladad per la communiun dils malsauns ed attempai a casa,
- c) responsabladad per retscheiver las baras ed accumpignar quellas en caplutta da morts,
- d) organisar ina persuna che meina il rusari da morts,
- e) A Rabius e Surrein fa in commember dalla grupp da liturgia las oraziuns en caplutta da morts avon il funeral. A Sumvitg ei quei pensum surschaus alla calustra.
- f) A Rabius organisescha la grupp da liturgia il til da bara dalla caplutta entochen en baselgia.

Tuts pensums san tenor basegns era vegnir delegai a persunas che fan buca part dalla grupp da liturgia.

Il sectur „CUMINONZA“

Ina cuminonza ligia ils carstgauns in cun l'auter, ella dat ina identitad. Negin sa esser cuminonza mo per sesez. Era Jesus ei buca viandaus persuls. El ha naven dall'entschatta da sia missiun rimnau giuvnals. Per suandar Jesus drova ei ina cuminonza.

En quei sectur ein ils pensums defini sco suonda:

- a) organisar cuors e scolaziun per carschi (per ex. cuors per parter ora la communiun, sentupadas per realisaziun da devoziuns etc.),
- b) brattar ora e metter a disposiziun material da devoziuns e survetschs divins ch'ei gia avon maun ellas gruppas localas,
- c) organisaziun da sentupadas cun affons pigns, per exempel cun temas tenor il calender ecclesiastic,
- d) preparar en cass da basegns il cant e la musica pils survetschs divins,
- e) contact e collaboraziun denter las gruppas localas.

Finanzas

Per cuvierer ils basegns finansials conceda la suprastonza dalla pleiv alla grupp da liturgia el rom dil preventiv ina contribuziun annuala.

Per acziuns spontanias che survargan quella contribuziun sa la suprastonza dalla pleiv conceder sin damonda dalla giunta dalla grupp da liturgia ina contribuziun supplementara.

Carnet da pensums per la gruppa da liturgia dalla pleiv Sumvitg


Entrada en vigur

Quest carnet da pensums va en vigur cun igl 1. da schaner 2017.

Approbaus dalla suprastanza dalla pleiv transitoria ils 3 da november 2016.

Per la pleiv transitoria Sumvitg

Il president



Igl actuar

